



Wan gaed blong ol apliken blong Pacific Engagement Visa (PEV):

Rod blong lukaotem wok long Ostrelia:

Oli bin mekem jeklis ia blong helpem ol apliken blong PEV blong lukaotem wok long Ostrelia blong mekem sua se yu mitim ol rul blong visa ia. Yusum jeklis ia blong mekem yu oganaes gud mo yu gat konfidens taem yu plan blong lukaotem wok, aplae long wok mo rere long wok mo laef long Ostrelia.



Step 1: Mekem wan plan blong lukaotem wok

Sapos yu gat wan plan blong lukaotem wok, bae hem i helpem yu plante blong tingting long hem, trakem progres long hem mo mekem ol sej blong lukaotem wok i moa isi long yu.

- Mekem taem blong lukaotem wok long evri dei o long evri wik
- Putum wan gol blong yu, olsem se bae yu aplae long hamas wok long evri dei o yu lukaotem wok blong hamas haoa long wan dei
- Kipim ol rikod blong evri wok we yu aplae from (olsem nem blong kampani, rol long wok ia mo deit we yu bin aplae)
- Tingbaot ol wok we hem i stret folem ol skil mo ol kwalifikesen blong yu mo wanem yu intres long hem.



Step 2: Mekem wan resume

Sapos yu raetem wan gudfala resume bae hem i help blong mekem ol emploia i wantem save moa long yu mo tu blong yu save soemaot ol skil blong yu.

- Yusum resume templet blong PEV we oli givimaot blong mekem wan profesonel resume (CV)
- Mekem list blong evri wok we yu bin mekem finis (tugeta kaen wok - hemia we oli pem mo hemia we yu wan volontia nomo)
- Listim ol skil mo ol kwalifikesen blong yu
- Inkludum tufala kontak blong oli mekem ol refrens jek (inkludum nem blong olgeta, rol long wok blong olgeta, kampani mo imel adres blong olgeta)
- Askem Emploimen Sapot Sevis blong PEV blong oli save jekem resume blong yu.





Step 3: Lukaotem mo aplae long ol wok

Sapos yu lukaotem wok long onlaen bae yu save faenem bitim taosen wok we oli listim i stap.

- Lukaotem wok long ol websaet olsem SEEK, Indeed Australia, LinkedIn mo Australian JobSearch
- Setemap ol alet blong wok blong mekem sua se yu no mestem ol niufala opotuniti
- Mekem wan onlaen profael long wan websaet mo fulumap ol diteil long saed blong yu
- I gud blong yu mekem yu rere oltaem blong eksplenem long olgeta se PEV we yu holem hem i givim raet long yu blong karem wok long Ostrelia olsem wan pemanen residen.



Step 4: Rere long ol intaviu blong wok

Taem yu mekem yu rere blong wan intaviu blong wok, bae yu bildimap konfidens blong yu mo bae ol emploia oli luksave se yu nao stret woka blong joenem kampani blong olgeta.

- Bifo yu go long intaviu, mekem risej long kampani mo indastri we yu aplae long hem.
- I gud yu praktisim blong ansarem ol kwesten we oli save askem long yu.
- I gud yu lanem moa long saed blong fasin blong toktok long ol wokples long Ostrelia.
- I gud yu werem ol naesfala klos mo kam stret long taem.
- I gud yu rere long samfala kwesten blong yu askem long emploia ia.



Step 5: Andastanem ol raet blong yu mo jekem gud ofa blong wok we yu risivim

Hem i impoten blong jekem gud ofa blong wok blong mekem sua se hem i truwan mo bae hem i save protektem yu long eni kaen kondisen long wok we i no sef o i no fea long ol woka.

- Jekem gud se ofa blong wok ia hem i pemanen (hem i nogat en blong hem) mo hem i mitim ol rul blong PEV.
- Imelem ofa blong wok blong yu i go long Emploimen Sapot Sevis blong PEV blong oli save jekem.
- Taem oli jekem finis mo konfem se hem i tru, bae yu risivim wan cover letter blong yu save aplodem wetem aplikesen blong visa blong yu.
- No fogetem se taem yu karem wan PEV, yu yu gat semak raet blong wok long Ostrelia olsem ol narafala sitisen long Ostrelia.



Step 6: Mekem yu rere blong lego hom ples mo statem wok

Sapos yu kasem evri infomesen we yu nidim mo yu rere gud, bae i helpem yu plante blong yu save muv i kam long Ostrelia blong wok mo stap gud.

- Lanem moa long saed blong kalja blong ol wokples long Ostrelia.
- Toktok wetem emploia blong yu blong oli save plan blong yu blong kam long Ostrelia.
- I gud blong save se hem i stret nomo blong askem ol kwesten long olgeta from bae hem i soemaot se yu stap tekem lidasip long rod blong yu - bae hem i no wan saen long olgeta se yu no gat rispek.
- I gud blong yu mas kam long taem, speseli long fes dei blong wok.



No fogetem se Emploimen Sapot Sevis blong PEV we hem i fri nomo bae i save helpem yu truaot long proses ia, blong:

- Save hao blong lukaotem wok long Ostrelia
- Konektem yu wetem ol emploia mo ol opotuniti blong wok long Ostrelia
- Mekem yu rere long ol intaviu blong wok
- Talemaot abaot ol opotuniti blong wok long Ostrelia
- Givim sapot long yu wetem ol aplikesen blong wok mo resume blong yu
- Givim sapot long yu go kasem taem yu statem wok, mo helpem yu blong andastanem ol raet blong yu long saed blong wok long Ostrelia.



Yu save kasem moa infomesen long saed blong Emploimen Sapot Sevis blong PEV long websaet ia: pev.gov.au

Long websaet blong mifala, yu save faenem moa risos, olsem ol pepa blong infomesen long saed blong emploimen mo ol templet blong mekem wan resume (CV). Mo tu yu save saenap long ol Emploimen Infomesen Sesen blong lanem moa long saed blong hao blong lukaotem wok long Ostrelia.

